

29-bob. Dalolatnoma yozuvlariga o'zgartirish, tuzatish va qo'shimchalar kiritish

Qarang: O'zbekiston Respublikasi Vazirlar Mahkamasining 2016-yil 14-noyabrda 387-sonli qarori bilan tasdiqlangan "Fuqarolik holati dalolatnomalarini qayd etish qoidalarini"ning IX bobi ("Dalolatnoma yozuvlarini o'zgartirish, tuzatish, to'ldirish").

228-modda. Dalolatnoma yozuvlariga o'zgartirish kiritish haqidagi arizalarni ko'rib chiqish joyi

O'zbekiston Respublikasi hududida tuzilgan fuqarolik holati dalolatnomalari yozuvlariga o'zgartirish, tuzatish va qo'shimchalar kiritish yetarli asoslar mavjud bo'lib, manfaatdor shaxslar o'rtasida nizo bo'lmaganda ushbu dalolatnoma yozuvlari saqlanayotgan joydagi fuqarolik holati dalolatnomalarini yozish organi tomonidan amalga oshiriladi.

O'n olti yoshga to'lgan shaxslarning tug'ilish, nikoh tuzish, nikohdan ajralishni qayd etish daftarlariga o'zgartirishlar kiritish ularning arizalariga binoan amalga oshiriladi.

O'n olti yoshga to'lmagan shaxslarning tug'ilish haqidagi yozuvlar daftariga o'zgartirishlar kiritish ularning ota-onasi arizasiga binoan amalga oshiriladi.

O'zbekiston Respublikasi hududidan tashqarida tuzilgan fuqarolik holati dalolatnomalari yozuvlariga tuzatishlar kiritish haqidagi arizalar ariza beruvchining yashash joyidagi fuqarolik holati dalolatnomalarini yozish organida ko'rib chiqiladi.

Fuqarolik holati dalolatnomalarini yozish organining dalolatnoma yozuvlariga o'zgartirish, tuzatish va qo'shimchalar kiritishni rad etish to'g'risidagi xulosasi ustidan sudga shikoyat qilinishi mumkin.

Qarang: O‘zbekiston Respublikasining Ma‘muriy sud ishlarini yuritish to‘g‘risidagi kodeksi 27-moddasi birinchi qismi 4-bandi, O‘zbekiston Respublikasi Oliy sudi Plenumining 1992-yil 13-noyabrdagi 5a-sonli “Fuqarolik holati dalolatnomalari yozuvlaridagi xatoliklarni belgilashni tartibga soluvchi qonunchilikni sudlar tomonidan qo‘llanishi haqida”gi qarori.

229-modda. Jins o‘zgarganda dalolatnoma yozuviga tuzatishlar kiritish

Jins o‘zgarganda dalolatnoma yozuviga tuzatish kiritish faqat sog‘liqni saqlash organlari xulosasiga asosan amalga oshiriladi.